



Uunga
Doris Jakobsen Jensen
Inatsisartunut ilaasortaq
Siumut

**Soraarnerussutisiaqarnissamut ileqqaartussaataitanermi akiligassat pillugit § 37
naapertorlugu apeqqummut akissuteqaat (039-2023)**

Brevdato: 21-02-2023
Sags nr. 2023 - 2849

Asasara Doris Jakobsen Jensen

P. O. Box 1037
3900 Nuuk

Matumuuna § 37 naapertorlugu apeqqutinnut akissut nassiunneqarpoq. Akissuteqaat Akileraartarnermut Aqutsisoqarfik suleqatigalugu suliarineqarpoq.

Tel. (+299) 34 50 00
Fax (+299) 34 63 50

E-mail: oed@nanaoq.gl
www.naalakkersuisut.gl

**1) Soraarnerussutisiaqarnissamut procent pinngitsaalisamik akiligassaasoq
katillugu 5% annerpaaffiliussatut inissillugu piumasaqaatigigaanni qanoq
kinguneqassava?**

Soraarnerussutisiaqarnissamut procentip 5 %-imut apparneqarnerani erniinnartumik innuttaasut, inatsisitigut aalajangikkap minnerpaartaanik taamaallaat akiliisartut, aningaasat atoriaannaasaat qaffassapput, taamaasillutillu piffissami ileqqaarnerminni annertunerusumik atuisinnaassallutik.

Minnerpaamik ileqqaarneq appasinnerusoq innuttaasunut, soraarnerussutisiaqalernermi inuuniarnermi atugarisaannik malunnartumik appariartitsissaaq, imaluunniit pisortanit utoqqalinersiat annertunerusut pissarsiarisarnersigut nanertuusiineq annertusissallugu. Utoqqalinersiat annertunerusut pisortani aningaasaqarnermi attassisinnaaneq annikillisassavaat, taamaasillunilu kinguaariinnut tulliuuttunut annertunerusumik nammagasssiissallutik.

Kalaallit Nunaanni Naatsorsueqqissaartarfiup inuiaqatigiinnik siumut naatsorsuinerisa takutippaat ukiuni aggersuni utoqqaat amerleriarujussuassasut. Tamanna utoqqaat pillugit suliassaqaarfimmi aningaasartuutit qaffakkiartornerannik kinguneqassaaq, ilaatigut utoqqalinersianut, utoqqaat illuisa illutaannut aamma taakkuninnga aqutsinermut assigisaannullu atatillugu. Utoqqaat pillugit suliassaqaarfimmi aningaasartuutit allatut oqaatigalugu, ataatsimut pisortat aningaasaqarnerata ineriartornissaanut sunniuteqarnerujunngussaaq.

Isumaqatigiissutit pillugit immikkoortumut qiviraanni, ullumikkut suliassaqaarfiit amerlanerpaat isumaqatigiissuteqarput akissarsiat 10 aamma 15%-iisa missaanni soraarnerussutisiaqalernissamut akiliisarneq pillugu. Taamaasillutik innuttaasut isumaqatigiissutit ataanni atorfeqartut innuttaasunit, 5%-iinnarmik ileqqaartunut sanilliullugit utoqqalinerminni annertunerusumik aningaasaqarnikkut qularnaarsimassallutik.

Maannakkut tamakkiisumik atulersitsiartuaarnermi 10%-imik annerpaaffissaliinermi qulakkeerneqassaaq, innuttaasut isumaqatigiissuteqarfiup iluani avataanilu atorfeqartut akornanni aningaasaqarnikkut naligiinnerunissaat.

Soraarnerussutisiaqalernissamut procentip 5%-imut appartinneqarnerani, soraarnerussutisiaqalernissamut aqqissuussinernut akiliinerni ilanngaait aamma ilanngussisussaanginnerup apparnerata kingunerisaanik piffissami sivikitsumi akileraarutinit iluanaarutit annikitsumik qaffannissaat aamma naatsorsuutigineqassaaq.

2) Soraarnerussutisiaqarnissamut procent pinngitsaalisamik akiligassaasoq katillugu 5% annerpaaffiliussatut inissillugu piumasaqaatigigaanni, inatsisitigut peqqussutini sorliit qanorlu allanngortinneqassappat?

Akiliutissat annertussusaannut piumasaqaat Soraarnerussutisiaqalernissamut aqqissuussinermut peqataasussaataaneq pillugu Inatsisartut inatsisaanni nr. 21, 28. november 2016-inimeersumi allassimavoq. Inatsisartut inatsisaat arlaleriarluni allanngortinneqarnikuuvoq, kingullermik allanngortinneqarluni Soraarnerussutisiaqalernissamut aqqissuussinermut peqataasussaataaneq pillugu Inatsisartut inatsisaata allanngortinneqarnera pillugu Inatsisartut inatsisaat nr. 29, 25. november 2022-meersumi (Naliliineq, erseqqissaaneq aningaasartallu killinginik allanngineq).

Akiliutissanut piumasaqaatit ileqqaarutit tunngaviini 2022-mi 6%-mit 2026-mi 10%-imut ingerlaavartumik qaffakkiartuaassapput. Namminersorlunili inuussutissarsiuteqarluni suliffeqarfinnut akileraarutitigut sinneqartoorutinit taamaallaat piumasaqaataavoq 2023-mi 5%-iussasoq kingornalu 6%-iussasoq.

Akit allanngortinneqassappata inatsisitigut allannguinissaq taamaattumik pisariaqassaaq.

3) Pinngitsaalisamik soraarnerussutisiaqarnissamut katersaqartussaannermit kinguaattoortunut akiliisitsiniarnerisa saniatigut, Akileraartarnermut Aqutsisoqarfiup akileraarusiineq aqqutigalugu akiligassat allat pinngitsaalisamik akiliisinneqarsinnaatitaappat?

§ 37 naapertorlugu apeqqummut 2023-36-mut sammisamut matumunnga tunngasumut Naalakkersuisut akissutaanni paasisutissiissutigineqartutut, pingaaruteqarpoq eqqumaffigissallugu, innuttaasut soraarnerussutisiaqalernissamut ileqqaakkaminut akiliutaat innuttaasut pigisarigaat, aningaasallu akileneqartut erniaqartut soraarnerussutisiaqalernissamut innuttaasunut utertinneqassasut.

Taamaattumik pingaaruteqarpoq immikkoortissallugit pisut Akileraartarnermut Aqutsisoqarfiup innuttaasut suliffeqarfiillu pisortanut akiitsuisa akilersinniarneri, kiisalu pisut Akileraartarnermut Aqutsisoqarfiup, innuttaasup soraarnerussutisiaqarnissaq pillugu imminut akiitsuni akilersinneri.

Pisortanut akiitsunik pinngitsaaliissummik akiliisitsiniarneq eqqartuussisarnermi inatsimmi aamma pisortanut akiitsut akilersinniarneqartarnerat pinaveersaartinneqarnissaallu pillugit inatsisartut inatsisaanni malittarisassanik aalajangersarneqarput, taakkulu ilaatigut imaraat akissarsianik uninngatitsinissamut peqqussuteqarsinnaaneq, akiliussineq il.il.

Malittarisassat taakku innuttaasup imminut akiitsuinut soraarnerussutisiassanik akiliisitsiniarnermut atornerarsinnaangillat. Taamaattumik Soraarnerussutisiaqalernissamut aqqissuussinermut peqataasussaataaneq pillugu Inatsisartut inatsisaata akuersissutigineqarnerani pisariaqarsimavoq ileqqaarnissamut pisussaaffiit naammatsinneqanngitsut pillugit akiliisitsiniarnermut periutsimik nutaamik

eqquassinisaaq. Taamaattumik periuseqanngikkaanni inatsit sulinermi malinneqarsinnaangilaq. Periutsimik siunertaavoq innuttaasup skattekortiani ilassuteqarluni procentip qaffannissaa, kingornalu ilassutip innuttaasup soraarnerussutisiaqalernissamut aqqissuussaanut akilernissaa.

Taamaattumik pinngitsaaliilluni akiliisitsiniarneq pineqanngilaq, Akileraartarnermut Aqutsisoqarfiup skattekortit qaffanneqarnikut aqutugalugit ileqqaarnissamut pisussaaffiit eqquutsinneqanngitsut akilersinniaarangagit.

Pisassarisanik allanik taama akilersinneqarsinnaasunik soqanngilaq. Taamaattorli akileraarutissat sinneri 18.000 kr.-it tungaannut (16.981 kr. + 6% akiligassaq) ukiut tulliani siumoortumik nalunaarsuinermi innuttaasup inummut ilanngaataanit ilanngaateqarnikkut akilersinneqartarput.

4) Soraarnerussutisiaqarnissamut katersaqartussaataallutik kinguaattoortut, innuttaasut akileraarutikkut (skat %) aallerfigineqarsinnaanerit atorunnaarsissagaanni, tassa nalinginnaasutut akiligassatut allatulli piumasarineqartalersillugu, suut inatsisit maleruagassallu allanngortinneqartariaqarpat?

Pinngitsaalisamik akiliisitsiniarneq pineqanngilaq, innuttaasup allanut akiitsui pineqanngimmata. Aningaasat innuttaasup imminut akiitsui pineqarput.

Siullertut eqqartuussisarnermi inatsimmik allannguinnisaaq piunasaqaataassaaq, innuttaasup ileqqaarnissamut pisussaataaffii naammassineqanngitsut innuttaasup pisortanut akiitsui assigalugit akiliisinniarniqartassappata.

Naalakkersuisut maannakkorpiaq pilersaaruteqanngillat suliassaqarfimmi tassani allannguiniarlutik eqqartuussisarnermut inatsit allanngortinniarnissaanut. Taamatut Danmarkimi folketingip akiliisitsiniartarnermi inatsisini allannguinnisaaq taama tunngaviutigisoq allanngortikkusussaneraat qularnarpoq.

Tamatuma saniatigut aamma pisortanut akiitsut akilersinniarniqartarnerat pinaveersaartinneqarnissaallu pillugit inatsisartut inatsisaanni allannguinnisaaq pisariaqartariaqassaaq.

5) Apeqqutigineqartuni paasissutissat pissarsiarisinnaanngikkaanni itisileqqissaakkamik paasissutissat pissarsiarisinnaanerit aqutissat nassuiaatigeqquneqarput, tamassumunngalu aningaasartuuteqartariaqartoqarpat missingersuutissaat ilanngullugit.

Neriuppunga apeqqutit apeqqutigineqartut matumuuna akisimassallugit, itisiliinissamulli ersarissanissamullu pisariaqartitsisoqarpat soorunami piareersimavunga.

Inussiarnersumik inuulluaqqusillunga

Naaja H. Nathanielsen
Naaja H. Nathanielsen